

UPNA LE KAMMAL (5)

Christian nuntakna i cih in, "Kanung hongzui in," (Jn 1:43, Lk 14:27, 18: 22) ci-in hongsam Christu Topa tawh nuntak khawmna ahihi. Tua nuntakna in leitungah deihna libang cinna ding, leitungah min le vang lawibang athan nading, leitungah gualtung vabangtuangin, khutngakna khempeuhah sumlom asuak sakding leh, kham le ngun tawh kizemin, tuallen na mun le mual khempeuh ah, alimpen ne in, atui penpen adawn den ding; khuamual suak leh minlawh hanla sa in, sumlu tungah gualzawhna lukhu khu in, tuanna peuh ah asangpen mun ngahnang ahi kei hi. Tua bang nuntakna lunggulh in Topa nungzui Chritian mite in, Pasian vangliatna leh Pasian hoihna zonglo in, gilvah nadingbek tawh Topa azong mite ahihi. Jesu Topa in, "A mantakin ci lehang: Ka nalamdang bawlte na muh uh ciangin kei hong umin ahongzong nahi kei uha, ann na khamtakun na nek uh manin ahongzong nahi bek uhhi" (Jn 6:26) ci-in, taaina leh mawhsakna tawh thu na hilh hi.

Christian nuntakna in, eima singlamteh pua in honggum Topa nungzui aa nuntakna ahihi. Topa in, "Ama singlamteh pua in, kanung hongzui lo mi in, kanungzui asuak theikei dinghi," (Lk 14:27) ci-in hong vaikhak hi. Topa kammal umin, Topa thu sungah i nuntakna kipiakna in Christian nuntakna man ahih manin, Topa honggen thu, hong vaikhak thute eideih thu tawh laihi, eideihbangin i kheel theikei hi. Christian thu ummi i cih in, honggum Topa tawh vana om Pa Pasian pen "Pa aw - *Abba*" (Rom 8:15, Gal 4:6) ci-in, saptheihna khuan angah, hehpihna thupha hangin amah tawh unau sanggam leh innkuan khat asuakte ihihi. Topa in ama innkuanpihding mite in abangci mite hidinghiam cih thu honggen na-ah, "Ka thugen za a, azui te in, kanu, kasanggam numei leh kasanggam pasal te ahi uhhi" (Lk 8: 21) ci-in, honghilh hi. Hihthu hangin, Topa nung zui Christian taktakte nuntakna in, Topa honggenthu te tungah kinga in, Topa honggen thu te zui in nuntakpihna ahihi.

Tu hun ciangin, honggum Topa' thu za in, ngai in, athu amang mi i suak ding nakpi takin thupi hi. Mi tampi te in, Topa hong genthu tawh kikeelki in, ki langngat in Christian nuntakna lam in, thu hilh uha, Laisiangtho sim napi in, haklela khua mulo te tawh akibang mitampi ki omta hi. Topa in, na singlamteh pua-in kanung nongzuih kei leh, kanungzui nahi ngeikei dinghi, ci-in honghilh hina pi-in, tu hun Christian tampi takin, Topa pen eima puakding singlamteh suan in, i puasak nuamta hi. Topa in, Calvary mualah nang tangin sikhin hi, na singlamteh hongpuaksak khin hi, ci-in genbel in nei in, Laisiangtho sim ing aci mitampi te in, asim Topa Kammal sangin, akigenkhia mihing kammal umzaw in, pai khialhna in nei uhhi.

Laisiangtho sung munkhat beekah, Christu Topa in nang puaktang ding singlamteh kongpuak sakkhin hi, ci-in hong hilhna i mu khakei dinghi. Na singlamteh kisuan tawmin, nang le nang in pua inla, keipai na Calvary mualah hongzui in, ci-in hongsam ahizaw hi. Tua hi na pi-in, tuhun mitampi tak te in, Topa' liangko ah, eima singlamteh suanin Calvary mual ah eite mai-ah pai in i sawl a, eite in anungpan in, bangmah pualo in, i zui hiathiat nuammawh hi. Hih in Christian tampi te ii anat lawh uh, cancer natna ahihi.

Topa kammal, Topa thugen te ngaihak sa in, zakhak i sa thei hi. Tua banah, zaksunsun zong telhak i salai hi. St Jerome (*one of the first and greatest biblical scholars*) in, Laisiangtho sungah Topa kammal, Topa thu azongsiam te ihi dinghi ci-in honghilh hi. Laisiangtho pen upna tawh simna hangin hong gum Christu Topa thu leh ahonggen kammal te atheithe ihihi. Tua thu hangin, Laisiangtho pen upna tawh simin, thu ngetna nasuaksak ding uhhi, ci hi. Banghanghiam cih leh mi pawlkhat te in, Laisiangtho sungah Topa thu leh Topa kammal zonglo mulo in, amaute deihna leh amaute lungsim anuamsak dingbek zonguh ahih man ahihi. Hih thu hangin, Laisiangtho sungah Topa thu le Topa kammal thuman thutak zonglo mulo in, eima deihna leh eite lungkimna bek azong Christian te

tampi tak ih omna thu aphawkhuai thukhat ahihi. Laisiangtho in eideihna zonnang mun hilo in, Pasion deihna leh Pasion thu zonnang mun, Pasion lungkimna banghiam ci-in, i muhna ding mun leh, Pasion tawh kiho namun ahihi. Laisiangtho sunga om Topa thu le Topa kammal te pen eideihna nung zuisak lo in, eite in, Laisiangtho sungah Topa honggen thu leh, Topa kammal te zui in, anuntakpih te i hihzawk na'ng, huhpa Khasiangtho in, Laisiangtho asim thei mimal khatciat hong mapi taken. Amen.